



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



Tir Yimyim



tiryimyim@aolima



tir yimyim

TAPAK 7

## Barcelona Open: Rafael Nadal-i takok nguogo

## Myanmar: Aung San Suu Kyi tepuokdak tesem melenshiogo



VOL. XXI ISSUE NO. 185 (ADOK 185) DIMAPUR YANGTEPNÜ (THURSDAY) RONGCHII (APRIL) 18, 2024 ₹ 5.00

### Apr 22 nungi May 11 tashi NH-29 shibangtsü

Dimapur, April 17, 2024 (TYO): April 22, 2024 nungi May 11, 2024 tashi Dimapur aser Kohima tsungda National Highway 29 shibangtsü osang metetdaksüogo. Iba mapang Ch. 123.840 (Chathe River Bridge/Patkai Junction) nungi Ch. 129 (Kukidolong River Bridge) tashi gari tila aser tulu ajak noktangtsü.

Anogoshia anepdang 4:00 ako nungi 7:00 ako tashi lenmang shibangtsü aser idangji nungkümlen aliba lung agientsü. Iba mapang tsungda 7th Mile Jn - Pimla - Mhainamtsi Jharnapani len senzütsü metetdaksür ta Chumoükedima Deputy Commissioner Abhinav Shivam, IAS-i ashi.

### Kohima district nung AFS putet

Kohima, April 17, 2024 (DIPR): Kohima kübok tesem kar nung African Swine Fever (ASF) putetba osang Deputy Commissioner-i metetdaksüogo. Kidima Village nung ak wara aliba putet aser iba jagi iba kilometre 1 telongtet 'infected zones' aser kilometre 10 telongtet

'surveillance zones' ama sangoktsüogo. AFS putetba ajanga item tesemtem nung ak tepsetba, tangalen nungi ak bener aruba mesüra bener aoba aser akshi mayoktsü tenokdangba agütsür ta Kohima DC-i tetuyuba agütsüogo.

### Kohima nung election nüboyimba tembangogo

Kohima, April 17, 2024 (DIPR): April 19, 2024 nü Lok Sabha election agitsü aliba atema nüboyimba maparen April 17, 2024 nikongdang 4:00 ako tembangogo ta Kohima Deputy Commissioner Kumar Ramnikant IAS-i ashi.

Item tetuyuba alema inyakertem küm 2 tashi tepuokdak ayutsü mesüra senchi achitsü mesüra temerenshi anaprong angutsü akok, ta paisa ashi.

Iba nung ajemdaker Kohima DC & DEO Ramnikant-i nübortemi meteta alitsü tetuyuba kar agütsüogo.

Kohima District nung nisung pungu den teimba adenshitsu aser public sentong ayonga agitsü memelar. Assembly Segment nung DEO/ARO nungi jelia temelaba meshiba sülen ang kilen sema senzütsü melatsü akok ta Kumar Ramnikant-isa metetdaksü.

Iba mapang tsungda election dak sendakba senden mesüra tanga sentong kecha ayonga magitsü aser cinematography, television mesüra ibala mesükba apparatus ajanga election osang kecha meprokshitsü ta pai ashi.

Assembly Constituency nung maliba political lenirtem, party züngsemtem, campaign mapa inyakertem ajaki constituency toktür aotsüla ta paisa ashi.

April 17, 2024 nikongdang 4:00 ako sülen musical concert mesüra theatrical performance sentong ayonga election osang prokshiba noktanger ta Kohima DC & DEO-isa ashi.

Item tenokdangba kübok District Administration, Security Personnel, magistrate on Duty, Medical personnel, tatidang agütsüba kaketshirtem aser election duty/essential services inyakertem madener, ta Kohima DC & DEO-isa ashi.

### ENPO-i ENLU züngsemtem dang kilong nung kazütsü mepishir

Dimapur, April 17, 2024 (TYO): Eastern Nagaland Legislators' Union (ENLU)-i Eastern Nagaland nung lemtet akhümtsübuttsü mepishir ta Eastern Nagaland People's Organization (ENPO)-i metetdaksüogo.

ENPO indang bangzüng anema ENLU-i Mongulbarnü Lok Sabha elections nung shilem agitsü temepishiba ka agüja liasü.

election nung shilem magiba ajanga iba asoshi olemtep nung tetsükdaksü ajurutsü ta ENLU-i ashi.

ENLU züngsemtemi kidang nungi malutsüla aser mepetmesü madoktsü atema vote meinoktsütsüla ta ENPO-i Bodbarnü ashi.

ENPO-i Lok Sabha elections nung shilem magitsü nenshia metetdaksüba sülen anogo ka lir Eastern Nagaland nungi MLA ajaki nübortem dang election nung shilem agitsü mepishia metetdaksü.

"Nübortem dang Frontier Nagaland Territory indang jenjang tezüluba ka ajanga metetdaksüogo anungji asenoki angajemdi aser tangatetba tajung nung lemtet agitsü imladi. Asenok temetentem angutsü atema asenoki asen teinyaktsü inyakdi, ta ENLU-isa metetdaksü.

Polling anogo nung mangatetep mesüra nungdak maliba tensa majurutsü atema iba ya metetdaksür kechiyong MLA temi vote enoktsütsü lemtetra nübortemi ibaji magizüktsü akok ta ENPO-isa ashi.

Mongulbar nikongdang Eastern Nagaland Legislators Union (ENLU)-i sangdong ka ajanga election nung shilem agitsü mepishia metetdaksü.

Külen, ENPO-i Lok Sabha elections nung shilem magiba Eastern Nagaland nungi MLA tem aser sorkar mapa inyaker densema senso kari danga timtem ajurura kümzüka ayutsü ta metetdaksüogo.

### Congress-i BJP lennir Imkong L Imchen-i jembiba aitsür

Dimapur, April 17, 2024 (Agencies): Congress-i Naga nung dak tashiyim mapa jenti inyakba atema tatok meshitsüla ta BJP lennir aser MLA Imkong L Imchen-i jembiba aitsür ta Congress-i metetdaksüogo.

pa dak tamang makar. Party melentsü yimya sübartemi tiyazü jembitsü yimya sübar" ta Ranajit Mukherjee-i ashi.

Convention aser India sorkar tsungda political agreement agi aser iba ajanga Nagaland state tentet, ta Apok-isa ashi.

AICC Secretary aser Nagaland & Sikkim in-charge Ranajit Mukherjee aser taoba MLA C Apok Jamir nati Advisor Imkong-i jembiba aitsür.

Nagaland nung BJP yarir ajema akümba agi iba amai jembir ta Mukherjee-isa ashi.

"Nisung ajaki April 19 polling anogo nung proxy voting aser booth capturing atema shisabulur. Iba atema Congress-i Chief Election Commissioner (CEO) dangi shidi zülüogo aser pai booths 50% nung web-casting asütsü nangzükogo. Web-casting malidak physical recording asütsü" ta Tripura, Nagaland, Sikkim, Manipur AICC in-charge Girish Chodankar-ia ashi.

Bodbar nikongdang Congress lennirtemi Dimapur nung osangbener den jembidang BJP-i nübortem ratadaksütsü asoshi putiotsü zülushitsü kanga meimer ta ashi.

"Imkong L Imchen-i kanga tim masüba olen jembio saka kodang nisung kati party tasen ka nung dendir party lennirtem peladaksütsü meranger. Tanü linük nung atalokba angudang shisabulur aser tangatetba shitak alir ajaki nübortem aser Constitution kümzüka ayutsü asoshi lemtet tajung agitsüla" ta Apok Jamir-ia ashi.

Chodankar-isa democracy aser Constitution kümzüka ayutsü atema nübortem, arogo lennirtem, NGOs aser civil society groups kanga kümküma alitsü mepishi.

"Imkong L Imchen-i iba olen jembiba ya kangasa majung aser tejashitsüka lir. Ajisüaka pai party melenpet melenba reprangdangra

### Nagaland nung anogo ishika tsüngsang majungtsü

Dimapur, April 17, 2024 (TYO): Nagaland ajungalen tzünglu arutsü ta Nagaland State Disaster Management Authority (NSDMA)-i metetdaksüogo.

April 19 nungi 23, 2024 tashi Chumoükedima, Dimapur, Jalukie, Noklak, Kohima, Mon, Peren, Phek, Shamator, Tseminyu aser Zunheboto district tem nung tzüsü agi sübanger tzünglu terara arutsü. Ajisüaka, kasa mapang Longleng, Mokokchung, Tuensang aser

Wokha district tem nungbo tzünglu kanga arutsü.

April 21, 2024 tashi Nagaland nung tsüngi aitsü, tsüngmok atentsü aser mopung kanga aontsü ta NSDMA-i ashi.

NSDMA, Home Department-isa District Disaster Management Authorities aser tanga line departments dang jeretpera alitsü aser nisung taküm den kiojentem kümzüktsü atema temulung agütsütsü metetdaksüogo.

### NBCC Clean Election Movement-i ayongzüker

Dimapur, April 17, 2024 (TYO): April 19, 2024 nü Lok Sabha election atema polling anogo atema Nagaland Baptist Church Council (NBCC) Clean Election Movement-i Core Committee züngsem ajak nem tetuyuba ka agütsüogo.

shia nung vote enokba mapa metenzükdang Pastor mesüra Youth Pastor temi polling station meshiteta sarasademtsü ashi.

anidaksü aser ozüng alema mapa meinyaktsü mepishir ta CEM NBCC-isa metetdaksü.

Clean Election Movement (NBCC) ajanga "nisung ka, vote ka" nung temulung agütsütsü aser ajungmesotsü metetdaksüogo.

Clean Election Movement-isa nisung shia dang tangatetba tajung nung aser tasü itta vote enoktsütsü aser lanurtem dang süpokrem, proxy voting mesüra ozüng alema inyaksangshi ajak nungi jembua alitsü ayongzükogo.

Nisung ajaki pei pei mobile phone nung cVIGIL app download asütsü aser polling station nung tim masüba kar dang ajitetra iba app ajanga osang sangoktsütsü mepishir ta Youth Secretary, Co-Convenor, CEM Rev. N. Suhuto Chishi aser Convenor, CEM NBCC Dr. Villo Naleo nati sangdong ka nung ashi.

Parnokisa Core Committee züngsemtem dang polling station

OFFICE OF THE  
**AO SENSO TELONGJEM DIMAPUR**  
Dimapur - 797112: Nagaland  
"Telongjem aser Terenlok"

Ref. No. ASTD/LS/PM/024/21 Date 17/04/2024

**AYIMOKTSÜR**

Tang aruya-a aliba 18<sup>th</sup> Lok Sabha election koba asen Naga lima nunga 19<sup>th</sup> April 2024 anogo nung agitsü sangdongogo iba dak sentakba maparen nung Dimapur nung alir Ao Senso shia dangi teinyaktsü aser meteta alitsü kar sangdonger.

- Iba election nung Indian senso ajak shilem agitsü temeden lir, anungji Dimapur nung alir Aotsür Aor shirsa vote agütsütsü temeden lir imlibilema nenok ajak iba anogo nung kidang atsüayonga makazüi pei pei ataba polling station-i or nü temeden vote-ji agüjang ta ASTD mendenti ajanga ayongzüker.
- Polling station ajak nung pei temeden meyongnem (voting right) asütsü asoshi yimya awashi tajung beshitsü mepishir aser shingai tashiyim mamshitsü aser lokti menentsüsa maparen kecha nunga shilem magitsü mepishia ayongzüker.

Sd/- Sd/-  
Ningsangwaba Pongen K. Tsuktisowa Longchar  
President, ASTD Secretary, ASTD

# Dimapur nung Lok Sabha Elections atema gari renema lir



18th Lok Sabha Election duty atema gari tem April 17, 2024 nü State Stadium, Dimapur nung adenshia aliba noksa ka yangi angur.

**Dimapur, Rongchii/April 17 (TYO):** 18th Lok Sabha Election atema Dimapur-I, Dimapur-II aser Dimapur-III nung aliba polling stations 172 atema gari 800 shi renema lir.

Iba maparen ya

Yanthumbemo Kikon, SDO (Civil) Transport Chairman lenisüba kübok inyaka liasü.

Dimapur-I, II aser III nungi driver tem election duty atema Dimapur State Stadium nung April 17, 2024 nü adenshi, ta Kikon-i

metetdaksü.

Kikon-i par team aser driver temi tashi angatempa amalitep akaba aser yaritepba asoshi pelaba lemsatempa liasü.

Meimlai timtem ajuruba mapang yaritepsü asoshi gari kar renema lir, ta paisa ashi.

# Election atema DC Kohima ajanga traffic ozüng kar metetdaksü

**Dimapur, Rongchii/April 17 (TYO):** 1-Nagaland Parliamentary Constituency nungi Lok Sabha atema General Election 2024 asoshi renemshitsü atema aser Deputy Commissioner Office Kohima ya Polling Materials aser EVMs/VVPATs indang Dispatch and Receiving Centre ka akumba yong Deputy Commissioner Kohima, Kumar Ramnikant, IAS ajanga totuyuba kar agütsüo.

Poll material bendentsü/

yutsütsü atema April 18 & 19, 2024 anogotem DC Office complex-i polling team indang gari 700 shi arutsü südi ta asadanteta lir. Aser polling teams aser security personnel bena aliba gari tem tetsükdak makai jajatsü mechi April 18 & 19, 2024 anogotem asoshi traffic ozüng kar metetdaksü.

Razhu Point Junction nungi Old NST aser D-Block ajanga TCP gate tashi ya No Parking Zone alitsü.

Y junction nungi tenzüka

DC Office exit route ya No Parking Zone alitsü.

North tsütsüi aoba gari tem TCP gate nungi NHAK junction, Naga Bazaar aser Census point Tinpatti leni yoktsü.

Election Duty nung aliba gari tem Local Ground nung anena aliba IG Stadium leni melenshiba mechi iba mera ya agir, anungji Kohima town nung aliba nübur ajaki iba totuyuba sülen anidaksü ayongzüker, ta DC Kohima ajangasa ashi.

# Dimapur nung Lok Sabha election atema Sector Officers training agütsü



Lok Sabha election asoshi Deputy Commissioner, Dimapur indang Conference Hall nung April 17, 2024 nü Sector Officers tem training agiba noksa nung angur.

**Dimapur, Rongchii/April 17 (TYO):** Aruya aliba Lok Sabha election 2024 nung Sector Officers tem pei shilem mapa inyaksü asoshi renema alitsü dak rangloker April 17, 2024 nü Deputy Commissioner, Dimapur indang Conference Hall nung training ka agia liasü.

Iba training nungya DC & DEO Dimapur, Dr. Tinojongshi Chang, NCS aser ADC Mhalo Humtsoe den Sector Officers tem dena liasü.

Dr. Vero (ALMTs) lenisüba

kübok iba training ya agi aser pai Sector Officers indang teinyaksü lemsatempa mapang, voting tenzüker mezüng ghonda ana tsüngta polling station ajunga semdangtsüba, Returning Officers nem poll commencement reports tem agütsütsüba, Mapa meinyaki aliba EVMs tem mapang shidak nung melentsütsüba, aser voters ajunga nem pei temeden vote agütsütsüsa mera agitsüba parnok mapa lir ta ashi.

EVM mapa junga

meinyakertem anepalutsü, mock mesüra shidakba vote agütsüba mapang Control Units (CUs) nung power pack melentsüba amala inyakyim sayua liasü.

DC Dimapur, Dr. Tinojongshi Chang-i jembidang Presiding Officers tasentem pei mapa shidak inyaksü asoshi lenmang sayutsü tongtipang lir ta ashi.

Training nung amalitep akaba atema pai Sector Officers aser master trainers dang pelaba lemsatempa liasü.

# ENLU-i nüburtem dang Lok Sabha election nung shilem agitsü ajungshir

**Kohima, Rongchii/April 17 (TYO):** Eastern Nagaland Legislators Union (ENLU) ajanga Bodhbarnü Eastern Nagaland nung aliba nüburtem dang 18th Lok Sabha general election nung shilem agitsü ayongzüker.

Nüburtem indang elected representatives ama, Frontier Nagaland Territory (FNT) akhangba dak sendakba nung nüburtem tejashiba angateter. Ajsüaka Lok Sabha Polls nung shilem magiba ajanga iba ken o jembishinü terenlok nung tetsükdaksü ang ajurutsü, ta ENLU sangdong ajanga ashi.

"FNT indang jenjang nüburtem nem Working Paper ajanga metetdaksü alinung, April 19 sülen inyaksü asoshi asenoki tangatetba tajung nung shisa kaa rangloksü ayongzüker," ta parnoki ashi.

Pei temeden agitetsü atema nüburtemi pei mapa inyaksüla, ta ENLU-i ashi.

Centre nung ajaki saklokba sorkar kumtetba sülen iba ken o jembishinüba nung onoki amalitep akatsü. Aser stakeholders ajunga dang nüburtem mechi iba democratic inyakyim nung timtem magütsütsü mepishir, ta ENLU sangdong ajangasa ashi.

# Dimapur nung polling station lemsatsüba maparen temogo

**Dimapur, Rongchii/April 17 (TYO):** 18th Lok Sabha election asoshi Dimapur district kübok polling personnel nem polling station lemsatsüba round tatembangba April 17, 2024 nü Deputy Commissioner, Dimapur office nung aliba NIC Video Conferencing Room nung takok ngua agia liasü.

Iba sentong nung DC & DEO, Dimapur, Dr. Tinojongshi Chang; Dimapur 1, 2 & 3 indang AROs, Nodal officer IT Lipokmeren Imchen, DIO, NIC Longpok Longkumer, Micro

Observer, Dimapur aser political party balala nungi representatives tem dena liasü.

Lipokmeren Imchen, Nodal Officer IT ajanga mera balala agiba indang osang agütsü aser election atema telok asem lemsaba pai ashi.

Telok asem ya tetsür kisüng telok ka, lanur telok ka aser temeyoktep telok ka lir ta pai ashi.

Dimapur district kübok polling stations 172 lemsüka lir aser tebur kisüng indang polling station 132 aser tetsür kisüng indang stations 40 lir ta pai ashi.



6-Tening Assembly Constituency atema P-2 Polling Parties (Advance team) batch mezüngbiba den EVMs aser election dak sendakba danga osettsüset bener April 17, 2024 nü ADC Office, Peren nungi pei polling stations bushia yokogo. ADC & ARO Tening, AEO Peren, Micro Observer aser political party balala nungi teshimtet nisungtem lia EVM/VVPATs machine tem yua aliba Strong Room Warehouse lapoka nungdakba oset agizüka parnok nem bener yok.

# Kohima DC-i nüburtem dang voting rights amshitsü ajungshir

**Dimapur, Rongchii/April 17 (TYO):** Deputy Commissioner aser District Election Officer Kohima, Kumar Ramnikant, IAS ajanga Kohima district kübok aliba nübur ajunga dang aruya aliba 18th Lok Sabha elections nung shilem agitsü ayongzüker.

Iba election atema polling ya April 19, 2024 anepdang 7:00 ako nungi nikongdang 4:00 ako tashi alitsü.

Election maparen tajungtiba nung inyaktetsü mechi DC Kohima ajanga nüburtem dang electoral roll jangja pei polling stations meteta alitsü ajungshia liasü.

Osang tejangja official website ceo.nagaland.gov.in nung angutsü mesüra Google Play Store nungi Voter's Helpline app download süa yangjia

reprangtetsü.

Electoral guidelines nung shia aliba ama temsüa aliba voters temi polling anogo proof of identity asoshi nungdakba kulizüng kaket tem bener arutsüla, ta ashi.

India nung democratic yimya wazüka ayutsü asoshi elections ya kanga tongtipang lir, anungji election nung senso ajungai shilem agitsü nungdak, ta DC & DEO Kohima ajanga ashi.

Pai temsüa aliba voters ajunga dang pei temeden sadok-sayima, ochishia aser tsüboa melie amshitsü ayongzüker.

Election maparen timtem majurui ochishia tajungtiba nung inyaktetsü mechi nungdakba mera ajak agia lir, ta paisa Kohima nung aliba nüburtem dang ashi.

# Mulungnen O

"Ni rara tajungji raraogo, ni alizung tonga asemogo aser ni tamangji yuogo,"  
- 2 Timoti 4:07.



Late. M. Imkongliba, NCS (Rtd)  
20.12.1947 - 10.04.2024

Mulungnen O ya onok timtem mapang nenoki yariba temeim mapatem asoshi onok mulungjang ajunga agi pelaba o lemsateper ta bilema agizükdaktsüner.

### Talisa item dang ya pelaba shisemer :

- Doctors, Nurses & Staff of CIHRS, Dimapur
- Dimapur Ao Baptist Arogo
- Mopungchuket Ao Baptist Arogo
- Nagaland Civil Service Association
- Dimapur Watsü Telongjem
- Ao Pensioners Union, Dimapur
- The Gideons International, Dimapur West Camp
- Mopungchuket Senso Telongjem, Dimapur
- LiveNow Events
- Audio Garage, Dimapur
- Mean Machine, Dimapur
- The Garden, Dimapur
- Neighbors

- Temeim Kinungtsü, Chirnur, Anükapang, Kinunger aser Semnchirtem.

Onok mangyim jashi nung alidang shirnokisa onok dang meima yariogo, nenok ajak dang onok **M.Imkongliba NCS (Rtd)**-er kibongi kanga pelaba lemsateper.

Onok timtem aser tejashi mapang adianukinungertem, tembar-medemertem, kidangkiyongertem aser temeimertemi ozü ki anepalutsüba, mang anükba, asüpila nung arua adenba aser leper tashi meinokja nübo, rongsen aser sarasadem agi onok nungita inyakba temeim mapatem ajak asoshi onoki kanga pelaba metetdaktsür. Nenoki aruagi semdangba aser aria bilem o yoka lemsateperba ajanga onok mulung nung tesünep aser tashi angudak küma anisüngzükogo.

Ano, len talang nungi arurtem, naro aser mangyim jashi lemsateperba osang yokertem aser temeim agi teyari tajung agütsürtem ajak dang ozü pelaba lemsateper. Nenok temeim mapatem agi onok khuret pongbadaktsü aser onok mulungjang nung kanga kongshiogo.

Ano maparen balala nung onok den yaripertemi sayuba temeim mapa tajung ajanga onok khuret pongbadaktsüba asoshi onoki kanga pelaba metetdaktsür. Onoki nisung shia dang onok pelaba ashitsübaji tasak, anungji iba



April 17, 2024 nü Kulgam nung Lok Sabha election nüboyim sentong ka nung Peoples Democratic Party (PDP) Tir, Mehbooba Mufti den party pusemertem tangokba noksa nung angur.

## India linük nung nütsüng crore 144 shi kümogo: UNFPA

**New Delhi, Rongchii/April 17 (Agencies):** India nunger nütsüng crore 144 shi kümogo aser nütsüng shilem 24 bo arrshi küm 0-14 tsüngdapurtem lir, ta UNFPA report ajanga metetdaktsü.

United Nations Population Fund's (UNFPA) State of World Population - 2024 report "Interwoven Lives, Threads of Hope: Ending Inequalities in Sexual and Reproductive Health and Rights" - report ajanga, taruba küm 77 nung India nunger nütsüng tang aliba dang nungi anasü agi teimba kümer alitsü, ta metetdaktsü.

Tang alima nung nütsüng teimtiba aliba linükji India lir (nütsüng crore 144.17), iba sülen tanabuba jenjang nung China (crore 142.5) lir, ta kasa report nung shia lir.

2011 küm census nung India nunger nütsüng crore 121 liasü. UNFPA report ajangasa, India nunger nütsüng shilem 24 bo arrshi küm 0-14 tsüngdapurtem lir aser nütsüng shilem 17 arrshi küm 10-19 tsüngdapurtem lir, ta metetdaktsü.

Nütsüng shilem 26 arrshi

küm 10-24 tsüngdapurtem aser nütsüng shilem 68 arrshi küm 15-64 tsüngdapurtem lir. Nütsüng shilem 7 arrshi küm 65 ser temapurtem lir.


India nung teburtem life expectancy ji küm 71 aser tetsürtem küm 74 lir.

Kasa report ajangasa, India nung 2006-2023 küm tsüngda tanur asü dang kibong akümba shilem 23 liasü aser tanur asodang asüba kanga ajema kümogo.

PLOS Global Public Health indang report "Estimates and Correlates of District-Level Maternal Mortality Ratio in India" nung ajemdaker UNFPA-i, India nung district 640 nung bushisü dangba ajanga nosodang asüba asadangra 100,000 shia nungi 70 dang tajemba asür, anungji maternal mortality ratio indang sustainable development goal (SDG) shilem asemsü nungi kabo takok nguogo, ta metetdaktsü.

India nung healthcare jenjang tajungba akümba ajanga taka-taiter tetsürtem kanga ajanzükogo aser lisopurtemia health care services tajungba angur.

## Trinamool Congress-i Lok Sabha election atema manifesto saya



April 17, 2024 nü Kolkata nung TMC lenirtem- Amit Mitra aser Derek O'Brien nati Lok Sabha election atema party election manifesto sayadang tangokba noksa nung angur.

**Kolkata, April 17 (Agencies):** Bodhbarnü West Bengal Chief Minister Mamata Banerjee-i aniba Trinamool Congress (TMC)-i taruba Lok Sabha election atema party manifesto sayaogo.

TMC manifesto nung tongti tenanzükba anaji Citizenship (Amendment) Act (CAA) aser National Register of Citizens (NRC) na agientsü, ta shia lir.

Tawa election nüboyim sentong ka nunga Mamata Banerjee-i, BJP-i iba linük ya 'detention camp' ka kümdaktsüdar, ta aija liasü.

TMC manifesto ajangasa, Uniform Civil Code (UCC) ya

linük tesem ajaklen mebenoktsü, arrshi küm 60 ser temapurtem old age pension sen 1000 tashi agütsütsü, ta nangzüka lir.

TMC-isa ration ki tsüngdong oa agütsütsü, BPL (Below Poverty Line) kibongtem nem küm shia gas cylinders 10 angati agütsütsü aser jenjang atuba azüoktsü atema 'Price Stabilisation Fund' tenzüksü nangzükogo.

Kaketshirtem temaba jenjang nung azüngtsü atema Student Credit Cards agütsütsü aser SCs, STs aser OBC katetshirtem scholarships tutsütsü, ta TMC-i nangzük.

West Bengal nung Lok

Sabha menden lemsaba tsütsü Congress den mangatettep adoka taküm January ita nung TMC-i INDIA teloktep toktsü, ajisüaka Mamata Banerjee-i national level nungbo lar party maneni INDIA teloktep nung dena lir, ta metetdaktsüogo.

TMC manifesto ajangasa Swaminathan Commission-i benokba ama aluyimertem nem MSP agütsütsü, ration card alir shia nem ita shia ration seret pongungu (5) agütsütsü, job card holders nem anogo 100 aayangtsü mapa agütsütsü aser aayangertem anogo ka taaji ishiba agia sen 400 sütsütsü, ta nangzük.

## Chhattisgarh kübok Kanker nung sepaitemi Maoists telungpur 29 khaset

**New Delhi, April 17 (Agencies):** Lok Sabha election tenzüksü anogo ishika dang lia Mongolbarnü Chhattisgarh state kübok Kanker district nung security sepaitem aser Maoists telungpurtem tsüngda khatepdang telungpur 29 khasetogo, ta BSF sepaitemi metetdaktsü.

Kanker district nung April 26 nü Lok Sabha elections agitsü.

Border Security Force (BSF)-i sangdong ka ajanga, Mongolbar nikongdang 2:00 ako meta Binagunda aser Koronar yim na tsüngda Hapatola arem nung BSF aser state police District Reserve Guard (DRG) na senteper telungpurtem mita aodang telungpurtem den rara tenzüka khatep, ta metetdaktsü.

Kasa sangdong ajanga, "Raraba tesem nungjagi

Maoists telungpur tasü mang 29, AK series rifles tenet aser Light Machine Guns asem angu," ta metetdaktsü.

"Khatepdang BSF sepa ka injang agi tetsüng yiru, saka pa tajungba lir," ta BSF-i metetdaktsü.

Inspector General of Police (Bastar Range), Sundarraj P-i, CPI (Maoist) telungpurtem iba tesem nungji aliba osang angazükba sülen parnok mita ao, ta metetdaktsü.

Maoists telungpurtem maitsüji tang tashi nungbo mejangja, ajisüaka parnok rongnung CPI (Maoist) north Bastar division nungi ketdangsertema kar densema lir, ta Sundarraj-i ashi.

Taküm küm tenzüker Bastar region kija nung Maoists telungpur 79 khasetogo.

(Maneni tapak 8 nung...)



## TIR YIMYIM YIMOBILEM (EDITORIAL)

DIMAPUR YANGTEPNÜ, APRIL (RONGCHII) 18, 2024

### Temelenshi tenzükdak

**T**ajung kümner atemabo anogo shia ya temelenshi tajung tenzükdak lir, anungji melenshitsu baji pei dak aketba tashi tuluka lir. Kasaji, yimten aser lokti tajungba kuma melenshitsu ba anogo tajungtibaji election ya lir. Atangji, election nung toktepertem rongnung asenoki saklokba aser aginuba nisung (candidate) malitsua akok, kechiyong election nung tokteptsuba ya mapa temela masu aser yimten yimsusur akumtsuba mapa yaa zubazubaa bilema inyaksuba mapa masu. Ano, talisa asen lima nungbo nubortem asoshi inyaksunuka election-i aitsuba ya terben bilemdanger aitsuba mapa ka kumogo, kechiyong election nung toktepertem rongnung adoker aser madoker ajak kasasa sentsusur aser meshimetsur kuma aoba angur. Ibaji election sentong aser inyakyim majungba agi masu saka election nung takok ngunu dang sen, sung, long aser injang bomb ajak amshia toktepbaja anga lir. Aji oda, asen lima nungbo election nung toktepnura, tamasa pa mesura laji tashiyim inyaktetba nisung tamajung ka asutsula aser pa mesura la ket nung sen crore ishikabo alitsula aser ano sen crore ishikabo sentem nung apudettsusa tashi aliba nisung ka asutsula. Election-i inuyonga item tongtibang nungdaktemji nisung ka dak keta melira, maiang tajungba kechiyong vote alitsus sen maka ser election nung toktepertembo nubortemi yiar aser matu amai bilema menusur. Iba jagi tanu election nung toktepertem ya nubortem asoshi shisatsus aser rongsen lenmang bushitsurtem masu saka election nung atsuba sentsu aotsu atema sen bushir amai kuma inyaker. Ibaji temeimtsuka aser shisabolutsuka lir. Iba shisabolu aser election sobaliba tamajungtem ya anener election sobaliba tajung ka tenzüksubaji election ajanga dang tenzüktesstus, kechiyong election ajanga alima raksaba ya election ajanga dang yanglushitettsus. Iba tangatetba nung asenok ajak asoshi asung April 19 nung agitsuba parliamentary election ya kanga tongtibang anogo lir. Iba yimobilem azungdang, ashiko, karbo pei vote yokadoker asutsua akok mesura vote agutsudak tashiyim agi ozung raksaba mapa inyaksu sentong yanglua alitsua akok. Ajisuka, pei vote magutsu aser election magi tashi asenoksasa asenok tajung kuma melenshitsu baji temenu masu. Ano, metenser yabo assembly election masu saka Nagaland ajunga agi parliamentary constituency ka dang ser tokteper, anungji pei yimsur yimer aser kinunger medemertem den tamajung tentepa vote agutsutsusa masu. Aji oda, election ka nung ajak prong ta melenshitsu tasak sura tang iba parliamentary election ya tetenzük ser asernokbo shinga danga pei vote mayoktsu, shinga meyonga vote meinoktsutsu, shinga amokmeren masutsu, shinga vote magutsu masutsu saka election ya yimten yimsusur shimba benjong ama ka munga pei vote peisasa pei mulungba candidate nem enoktsutsu ta asenoksasa asen dak aser asen alidak temelenshi tajung ka tenzükra, ya ser assembly election arudangbo asenok kolok aser mulungjang ajak melenshir temeruk aser ochiba election asoshi renemer alitsus. Idangjiang, ano yimten nung nubortem tenzüksu asoshi pei lima aser pei nubortem dang masu saka Tsungrem meimba candidate tajung, shiba shimer shiba meshim adoktsu. Idangjibo election-i aitsu atema nisung kaji takar aser tashiyim mapa inyaksu nungnanga maliba samaro nisung asutsula ta mejembitsus. Idangjibo, sen akayonga sen agi yimsusur mekumtetsu, anungji sentsusur-a makumtsu. Iba ama anogo kaji tangari tenzüksu masu 'ni tenzüksu' ta tanu asenok ajaki mulungtetdi. Tangarbo arogo nung shilem tajung agirtemang election-i ajungshia yoker saka asenokbo arogo nung shilem tajung agirtemiang election ya temenen mapa amato bilemer, anungji election-ibo nisung tamajung dang aitsula ta asenok arogo nung lenirtemia bilemer. Iba tangatetba meyipteptsuba anogo tajungtibaji tan parliamentary election ya asutsu. Iba election nung toktepertem ya temenen mapa inyaker masu aser election nung pei vote agutsui aobaja temenen mapa inyaki aoer masu saka tamanger tajung ka yimten nung pei temeten aser pei tata shilem ka inyaki aoer asutsu.

## OLEMSABANG

### Nai sapuba Party süaka takok tulu asoshi sarasadem masu tajungba

-S. T. Yapang Lkr, Kohima.

Centre nung Political party tashi ita aliba telok rongnung asen Naga nungeri tenzükba Party mali. Centre nung yimsusuba party ajak nung tamajung lir, tajungba lir. Asenoki ang metenzüker ashi Pastortem senteper Naga Pastor Party ta mesura Rev. nguteta alirtemi parnok asoshia political party ka tenzüksuji temzungi mela alitsus aser parnokia election-i aitsuji temsua lir mesura pa/la "iba party-ji support suang" mesura "vote iba party nemjibo teinoktsu" ta ashitsu/nubuyimtsuji temeten lir, saka asenok voter-temi metetsubaji pa/la/parnokji Tsungremer party masu mesura Tsungremer tesayuba masu, pa/la pei tejangraba nung nubuyimer dang aser pa/la election-i ai nunga aji Tsungrem election-i air masu pa/la neja dang ta asenoki jangja metetdi.

Nai Congress junger asur aser centre nung Congress mesura par teloktep I.N.D.I.A arudaksunuka tang MP election nung ya Congress menden 200 dang timba tadokdaksu ta sarasademtsu tim, kechiyong Congress kijai sorkar kumtetra asenok tamangba yimsu den meputepba ozung tasen LGBTQIA+ ya inoksemra koda? Ajibo yutsur alemli par mapang nubur taochi makai tepseta intoktsu Sepai nem tashi agutsuba AFSPA koba ajanga asen Naga nunger aika tepseta reshikangshia yimtem rungtoktsu, tang centre nung BJP-i aniba NDA yimsusuba mapang Nagalima tesem aika nungi AFSPA agiina lir, ibai ano meyipa benoktsu shingaia meteta maka, yamajisura na anasa cartsung ka pokra (tyre burst) teburtem tenaret suktinga zükerang tetsurtem kechi tiai ajar asenoki memetet. Idangji "Ni congress nem vote ajentsua sarasademtsuogo" ta ashiba agi na mekumzuktetsu. Ano Nagaland nung BJP metoktepaka centre nung BJP kija nema yamaji menden 200 dang timba mangutsusa na BJP pukumer ka asuyonga sarasademtsu tim, kechiyong BJP-i UCC ya benoka ora timtem lir.

Asen mulung masuakako, takoktsua sur party ka kijai 272 atena mengudaksunuba dang masu 200 atena metudaksunur. Yamaji asunung ang nubur ola angalema inyaksu, sarasademba yabo putir aikati sarademba melangzudang kecha meimlaba nisung kati sarasademba ang langzutsu akok, anungji na congress/BJP tepu akumer ka süaka ner party kijai sorkar kumtettsusabo Tsungrem dang sarasadem masu tajungba. Ajisuka tang Nagaland nungbo NDPP o Congress na tesashiba tokteptsusa angur, NDPP ya adokra pa kija asunungji koba teloki centre nung sorkar yangludir yangji tenkum, ano Congress adokra Congress kijai sorkar mekumteti I.N.D.I.A teloktepi sorkar kumra paa yangji tenkum.


### Tanagtetba alitsula

- T. Lima Jamir, Ungma Aonglenden, Artang Ward

Alima nung alir nützung nubur ajak ya tamang yimsu ka uniform ka oshi ka kuma alitsubaji asen Nagaland state asoshi shisabulutsu aser asen temulongjang animesungzuktetba mapang ka asutsu. Asen Nagaland nung tang masu alima ajunga nung takum Tsungrem dak a manger zünger mezungma alitsus, saka asen Nagalandji Khrista asoshi ta ayimtener masu no? jembia aruba amaji tamanger takum aser tamanger kibong kaka asunung ochishia alitsula masu no? India lima nung nungtugu party tulubaji Congress ya asutsu, saka tang aliba BJP tanishir Modibai Congress ajak jentoktsu meranger aser iba telok ya tenteter ano kum aikabo masu. Shitakba party jentoker BJP RSS temi yimsu asuba nung alima nung nützung yongzük kwi lir item ajakji tamang yimsu ka tang alitsus meranger südi, anungji asen Nagaland nung aliba Govt-i kanga bilemdangtsula masu na? Nagaland nung BJP amenloker amongnu kwiben osang aruogo ta bilemer olulu jembiba mangatsula ta jembibaji tarutsu mapang asoshi timtem rishikangshia aser shisabulua ataloktsu kecha menua mali. Anungji nützung nubur ashiockja BJP pukuma nützung nubur manisatsus mepishir. Temeim nützungnubur tajungtem, India nung tang ruling party BJP yagi power kanga amshir, opposition partytem kanga mezungmeshir, tongtipangsa Congress ya ka tanga melie ajak meshi meshia sentoktsu meranger, saka nützung nuburtemi tang shimtsu asunung vote azungnu tang metetsu. India lima nung koba party-i govt. bener arudir aruoka asen Nagaland nungi ka tang shimteter yoker asunungji kanga junga bilemdanger asen senti vote agutsudi. Asen Nagaland-I yokba nisungbaji pokpoi mesangjang amen ataba ama menden nung mener tangar jembiba repranga tenükjang longshia amentsuba aser repranga kazutsuba tang lir. Anungji asen Nagaland nungi shimtetba Congress nem asen vote agutsutsu asenok ajaki bilemalidi, kechiyong center nung party tuluba anaji Congress aser BJP tang asunung center nung aliba party pusem nung tang parliament senden nung o jembitsus mapang agutsutsu. Congress jaki govt. benang tepen asen Nagaland nungi Congressji shimteter yok nungang tajungba asutsu amai nibo angateter.

**Iba Olemsabang nung lemsaba ken-o aser shisatsus ya iba ocet züluri bilemba ken-o ama tazünger angateta agitsus mepishir**

## Iran-i Israel amakba ya Laishiba nung shinba atalokba lir: Greg Laurie



Pastor Greg Laurie

Facebook / @Greg Laurie

**April 17, 2024:** Anogo ishika tejaklen Iran-i Israel amakba sülen kanga nungtugu pastor kari, Iran-i Israel amakba ya Laishiba nung shin o atalokba lir, ta ashiba den külemi alima nung Khristanem dang Israel nung yimjung atema sarasademjang, ta mepishi.

April 14, 2024 anepdang züngia Iran-i drones aser missile 200 dak tema amshia Israel amak saka Israel nung air defense system den külemi US aser UK senteper missiles aser drones shilem 99 bo nokdangteta liasü.

Harvest Christian Fellowship nung Pastor, Greg Laurie-ia video ka ajanga, Iran-i Israel amakba ya Laishiba nung shinzüka aliba temaitsü lir ta amanger, ta metetdaksü.

Pai social media ajanga, "Iran-i Israel amakba ya Laishiba nung shinzüka aliba ataloker ta ni amanger," ta metetdaksü.

Pastor Laurie-i, "Laishiba nung shia aliba agi, tatembang anogo nung Yihuda nungertem tanaben pei lima nung adenshitsu indang shia lir. Ibaji atalokogo. 1948 kum May 14

anogo nung Israel ya official süa linük ka aküm," ta metetdaksü.

"Yihuda nungertem pei lima nung tanaben adenshiba dang masü saka parnok kanga sendoktsü. Ibaji atalokdar. Laishiba ajangasa tatembang anogo nung Yihuda nung sempaba kanga bulua akümsü ta shinzüka lir. Ibaji atalokdar. Laishiba ajangasa Israel north tsütsülen linük tulukati- Ezekiel nung shia aliba ama Magog-i la (Israel) amaktsü ta shia lir. Ibaji tang tashi nungbo matalok. Shishirtem aikati Magog ya tanü Russia ya asütsü ta bilemer," ta pastor Laurie-ia shi.

Ezekiel 37-38 nung "Magog"-i Persia (Iran) den longjemer Israel anema apusotsü, ta shia lir.

"Iran nungja ya Persia liasü. Parnoki 1930 kum nung ang nungja melen. Anungji Persia mesüra Iran-i Israel amakba ya Laishiba nung shinzüka liasü. Ibaji tang atalokogo. Tang tatalokbatem ajanga Ezekiel 38 nung shinzüka aliba ataloktsü, ta ni bilemer?," ta paisa metetdaksü.

Pastor Laurie-isa Khristan

dang, "Asenoki Israel nung asen medemerthem atema sarasademtsüdi. Asenoki Yihuda nungertem atema sarasademtsüdi," ta mepishia metetdaksü.

"United States of America-i Israel den nokdakba atema pelar. Kum aika tejaklen Tsüngremi Abraham dang tenangzüka ka metetdakja. 'Shirnoki nenok moatsüdir Ni parnok moatsütsü aser shinrnoki nenok atakatemdir Ni parnok atakatemtsü' ta shia lir. Tsüngremi United States moatsüba kuli rongnung kaji asenoki asen tembar Israel pusemba agi lir aser maneni pusemsü ta ni amanger," ta paisa metetdaksü.

Iran-i Israel amakba dak sendakba nung pastor John Hagee-ia, "Ezekiel-i tapu 38 aser 39 nung shia aliba Gog-Magog rara tenzüksü mapang ka nung asenok lir," ta ashi.

Hagee-i, tan hopta Christians United for Israel tenung nung pa Washington D.C-i aotsü aser House of Representatives züngsemtem dang Israel yaritsü atema langkabosa inyakang ta mepishitsü, ta metetdaksü.

## Muslim nungerkati tetsüi Khristan yimsü metoktsüba agi tepset

**Nairobi (Kenya), April 17 (Agencies):** Uganda linük nung Muslim nungerkati tetsüi Khristan yimsü metoktsüba agi tetsü nem chiyungtsü nung miim chisema südaksü.

Taküm February 10 nü Kamuli, Kamuli District nung arrshi kum 50, Sulaina Nabirye-i Khristan yimsü agizüka liasü. Iba mapang nungjagi tenzüka lar jabaso, Arajabu Mukiibi-i la dang Islam yimsü dangi tanaben meyipang ta rongshia aru.

Lar kinünger kati, "Ramadan ita nung lai, lar jabaso la dang Tenla kidangi aoba anenang aser Islam yimsü dangi tanaben meyipang, kechiyong oa Bugembe Mosque nung Imam akümsü nükjiding lir, ta shia

liasü. Ajisüaka lai Khristan yimsü toktsütsü memelungba agi jabaso tetsü amokmerena liasü," ta metetdaksü.

"La melungjang nung tesünep aser tepela liasü aser pastor sayutsüngi ajanga la tasü itta liasü. Ramadan mapang nung Arajabu Mukiibi-i tetsü kanga amokmeren. April 9 nü pa tetsü dangi oa tetsü dang, pa kinüngtsüi ajak atema chiyungtsü renemtsüdar ta ashi. Aonung 7:00 ako nung pai chiyungtsü bener arua tetsü nem agütsür ao. Sulaina-i chiyungtsüji achiba sülen mapang tatsüka tsüngda saaktsü aser tebok oa liasü. Tasüngnep 2:00 ako nung la asü," ta lar kinüngertemi

metetdaksü.

Chiyungtsü anünga alibaji medical clinic ka nung tendangba ajanga chiyungtsü nungji mesen asütsü mozü 'Methanol' densema aliba jangja.

"La miim chisemer timtemba mapang nung lar jabaso o kinüngtsü nati maru, ibayongji onoki pa dak melung malemstsüsa aküm," ta kinünger jagisa metetdaksü.

Nabirye-i February 9 nü Khristan yimsü indang angazüka liasü aser tasüngnü (February 10) sentong ka nung adenba sülen lai pastor dang la atema sarasademjang ta mepishi. Kasa anogo nungjisa lai Yisu Khrista agizüka liasü.

## ANOGO ABEN TSÜNGREM DEN

## Temulung atema teli

"Nenok shisabuluba ajak Pa dak yuang, kechiaser Pai nenok asoshi anepalur".

- I Peter 5:7

Tsüngremer nübur anema Satani inyakba mapa tamajungtibaji temulung makai kümdaktsübaji lir. Tejen aser Tasen Lai ajunga nung temeshi nisungtemi ibai paidoktsü makok. Elijai Carmel nung takok angu, tasüng nü juniper süngdong kübok kanga tasü meiti aküm. Ibai Tsüngrem nisungtemi ajangshia aruba lir.

Tenyar Paul madang jungkai adokba jenti liasü. Saka Pa temang nung ai ka asoshi paa tebilemstsü liasü. Pai iba dang "Satan nungi osangbener" Pa dak azüktsü yokba ta aja (2 Kor. 12 : 7). Pai ibaji agientsü asoshi Tsüngrem dang maneni mepishi. Saka Tsüngremi pa timtem endoktsütsü melen tashi dang itdaksü. Ibai tejashitsü ka, saka Tsüngrem taochi agi iba tejashi tepela agi melentsü (2 Kor 12: 9, 10). Satan tamakok angu. Temulung makai akümstsü melen Pauli takok ola agütsü, "Kodang ni tashi maiter, idangji ni tashi itta alir".

Satani lenmang aisü nungi Tsüngrem nisungtem tasü mait kümdaktsütsü meranger. Saka yashi, tanü aser asüng asen tebilemstsü ajak Tsüngrem dangi abentsü, kechiaser Pai anepalur ta Laishiba nung sayur. Telula, mesüra tetsübu; Pa teka anasa lir; Pa memelenshir, aser Pai asenok meimer; tamang dang amangdi arung.

## Televangelist aser sayutsüngir, Jerry Savelle alima nungi pilaogo



**April 17, 2024:** Televangelist aser sayutsüngir, Jerry Savelle Hombarnü (April 15) alima nungi pilaogo; pa arrshi kum 76 liasü.

Jerry Savelle-i tamangertem dang, iba akümli nung tamangertemi rongsenkettsüng aser anema aliba tsütsü jenajng tajungba ajangshitsü, ta sayutsüngia liasü.

Jerry Savelle Ministries International-i Facebook ajanga, sayutsüngir Jerry Hombarnü alima nungi pilaogo, ta metetdaksü.

Jerry Savelle Ministries International-isa, "Pa ya kinüngbu tajung ka, tebu, tebou, pastor, tesayur aser tembar tajung ka liasü. Iba lima nung adianu Jerry-i Yisu Khrista temeim tashi nung ajemdaker mapa tulu inyakogo. Pa taküm ajanga taochi aser tamang tashi indang kuli süogo," ta metetdaksü.

"Pai aiben asenok dang, Tsüngrem teka ajanga tajemzüka jenjang nung alirtema

takok ngudaktsür, ta nenshia aser sayutsüngir, Jerry Savelle metetdaksüogo. Tanübo pai tekümtet korang nguogo," ta Jerry Savelle Ministries International-isa metetdaksü.

JSMI-isa Jerry kinüngtsü Savelle, Jerriann, Terri aser par kibong züngsem ajak asoshi sarasademjang ta metetdaksü.

JSMI website ajanga ashiba agi, 1969 kum Jerry-i ministry mapa tenzüka liasü aser pai linük 40 dak tema nung Arogo 3,500 shi nung sayutsüngiogo.

Pa indang official ministry group ya Crowley, Texas nung amenoka lir aser Australia, Canada, South Africa den United Kingdom nunga ministry office amenoka lir.

Jerry Savelle-i, Tsüngrem dak tamang katetba ajanga tamangertem anema-alibaren aser rongsen jenjang tajungba kuma taküm nung azükarua alir, ta sayutsüngia aruogo.

2014 kum pai züluba kaket 'Why God Wants You to Prosper' nunga tamangertem azükarua aliba indang shia lir.

AO OSHI ANGAZÜKDAK: TANÜ ANGAZÜKTSÜBA OJANG



Süng

(n) tu keta meyiba dong ( wood)

\* Ki yangludang süng tapu aika nüngdaker.

Süngbang

(adv) kolenang mashi khuret agi asüng ( overburdened by urgent works)

\* Yimten lenirtem election mapatem agi süngbang.

OLONG PAITEP # 6760

Grid for OLONG PAITEP # 6760 with numbers 1-16 in a 4x4 pattern.

TIPIEN

- 1. Anenzükdak ki - (5)
3. Asür mangyimba - (5)
5. Temulung nung shisadang - (5)
8. T \_\_\_ lu - (3)
10. Takdang temalen - (9)
11. Tesa \_\_\_ a - (3)
13. Ajungbena temulungjang tongtonglatsü atu - (5)
15. Tejen lai nung tesayur - (5)
16. Tsüngsak-mopung - (5)

LANGTSÜNGLEN

- 1. Reprangdaksü - (4)
2. \_\_\_ ur - (3)
4. Kiojen yangludak - (6)
6. \_\_\_ ait - (7)
7. Nagaland nung ayong ka - (5)
9. Küm kasa purtem - (5)
10. Tetsüng tajemetdak - (6)
12. \_\_\_ adenshi - (4)
14. Tsünüsönongtsü adokdak - (3)

OLONG PAITEP # 6759 TELANGZÜBA


TIPIEN :

- 1. Kasa, 6. Rangben, 7. Mait, 9. Poktet, 11. Ati, 13. Atasa, 16. Rür, 17. Rajang, 20. Lanu, 24. Nüngjem, 25. Süra.

LANGTSÜNGLEN :

- 1. Khu, 2. Süjak, 3. Onük, 4. Oba, 5. Anü, 6. Ratet, 7. Mozü, 8. Ita, 10. Tar, 12. Tinu, 14. Salem, 15. Aja, 18. Anünü, 19. Taju, 21. Ano, 22. Onü, 23. Kua.

NAI-A YA METETTER MA



Mumbai nungi cyber security expert Chinmay Prabhu-i Guinness World Records title ka ngutetogo. Chinmay-i soap bubble telung nung rotating puzzle ka kotteta yanglu. Guinness World Records (GWR)-i iba osang den video ka April 16, 2024 nü Instagram nung lemsatepogo.

Otsü tassen ya pai February 24, 2024 nü merangdang aser second 29.97 nung pai soap bubble ka nung rotating puzzle tetrahedron yanglutet. Iba sülen March 20, 2024 nü Guinness World Records-i iba otsü agizüka liasü. Chinmay Prabhu-i tang tashi nung alima otsü pungu tashi yangluteta lir.

INDIA bloc sorkar kümra NRC, CAA agientsü: Mamata Banerjee



Guwahati, April 17, 2024 (Agencies): BJP-i linük ajunga ya "detention camp" kümdaktsüogo saka opposition bloc INDIA-i Centre nung sorkar kümra CAA aser NRC agientsü ta West Bengal Chief Minister Mamata Banerjee-i ashi.

Assam nung TMC candidate 4 atema election rally ka nung

jembidang "Prime Minister Narendra Modi-i tashi ngura democracy aser elections malitsü" ta Mamata-i ashi.

"BJP-i linük ajunga detention camp ka kümdaktsüogo. Ni kü taküm nung kodanga iba ama lendong aketba election mengudang" ta lai ashi.

TMC-i tamangba yimsü ajak meimer aser tamangba yimsü

nung ajemdaker nübertem tsüngda telemsa madokdaksünür, ta Mamata-isa shisem.

"INDIA bloc-i takok ngura National Register of Citizens (NRC), Citizenship Amendment Act (CAA) aser Uniform Civil Code (UCC) malitsü. Onoki ibala tebendang adokdaksüba ozüngtem agientsü" ta lai metetdaksü.

"Lok Sabha election nung Assam nung alirtemi Trinamool Congress candidate 4 nem vote enoktsütsü mepishir. 2026 Assam state assembly elections nung ozü teloki assembly menden 126 prong nung tokteptsü" ta Mamata-isa ashi.

"Tang ya trailer ka dang lir aser tatembang ano maru lir. Ni ano arutsü" ta laisa shisem.

Assam Lok Sabha Election nung 'crorepati' candidate 15 lir

Guwahati, April 17, 2024 (Agencies): Assam Lok Sabha elections nung 'crorepati' candidate 15 tashi lir aser parnoki parliamentary menden pungu nung tokteper.

Candidate 25 nungi parnok 15-i Rs 1 crore tema rongsen aliba metetdaksüogo aser parnok rongnung takartibaji independent candidate Diluwar Begum Chowdhury lir. Lai Kaziranga constituency nungi tokteper.

Jorhat, Kaziranga, Dibrugarh, Sonitpur aser Lakhimpur constituency 5 nung polling asütsü. Menden pungu nung Bharatiya Janata Party (BJP) candidate 5, Congress nungi 3, Aam Aadmi

Party (AAP) nungi 2 aser All India Trinamool Congress (AITC) o Bharatiya Gana Parishad (BGP) nungi kaka lir. Maneni Lok Sabha menden 5 nung Independent candidate asem lir.

AAP candidate tem indang rongsenji Rs 6 crore, iba sülen BJP candidate tem Rs 4 crore, Congress candidate tem Rs 3 crore aser AITC o BGP candidate shia Rs 1 crore rongsen aliba metetdaksüogo.

Independent candidate Diluwar Begum Chowdhury-i la indang fuel stations lir ta ashir aser la indang rongsenji Rs 17.58 crore tema lir.

BJP candidate tem rongnung Sonitpur candidate Ranjit Dutta

emerges takartiba aser pa sülen Union Minister Sarbanananda Sonowal aser MP Topon Gogoi na lir.

Congress candidate tem rongnung Uday Shankar Hazarika aser Gaurav Gogoi na sülen Premlal Ganju lir.

Maneni, Independent candidate ana- Pradip Bhandari aser Abdul Hoque den Trinamool Congress aser Bharatiya Gana Parishad candidate tem ket nunga rongsen lir.

Ajisüaka, Kaziranga constituency nung candidate kari Rs 1 lakh teküpok aser SUCI(C) Lakhimpur candidate Pallab Pegu-i Rs 38,169 rongsen aliba metetdakja lir.

Telungpurtemi Arunachal Pradesh BJP Iennir ka pur ao

Itanagar, April 17, 2024 (Agencies): Lok Sabha Election agitsü renemtepba mapang ka Bodbar anepdang 1:00 ako meta telungpur telok kati Gram Panchayat Chairman (GPC) ka pur ogo.

Telungpurtemi BJP züngsem Sangam Wangsu (50) par kidangi nungi pur ao ta ketdangsürtemi ashi.

Pa ya kechi atema pur ao

memetet bushisüngdang südar. NSCN-KYA teloki Assembly elections nung NPP candidate yaritsü tetuyuba ka agütsüba sülen iba ya atalokogo.

Longding Pumao assembly constituency nung telungpur telok kati candidate ka yaritsü tetuyuba agütsür aser amokmerener ta osang angazüker.

Iba constituency kübok yimtsüngtem nung iba tetuyuba

shidi ka prokshir. NSCN-KYA den sendaktepa alir telungpurtem kasa constituency kübok Niuasa, Longkhaw, Mintong aser Longphong yimtsüngtem nung aliba angashir.

Telungpurtemi prangpong amer National People's Party (NPP) candidate Thangwang Wangham nem vote enoktsütsü amokmerena senzür.



Mizoram sorkari 2023 küm Mizoram Civil Service, Mizoram Police Service and Mizoram Information Services atema tatidang agiba bushisüngdang asütsü tetuyuba agütsüogo. Mizoram Public Service Commission (MPSC)-i ketdangsüa agiba nung tim masüba inyakyim liasü ta kaketshir telok tongtiba Mizo Zirlai Pawl (MZP)-i anir lungkak aitba sülen state vigilance departmen-i taoba state chief secretary aser taoba MPSC chairman M. Lalmanzuala dang anogo 7 tsüngda preliminary inquiry asütsü tetuyuba agütsü.

# Myanmar: Aung San Suu Kyi tepuokdak tesem melenshiogo



**Naypyidaw, Rongchii/April 17 (Agencies):** Tzüngsang-mopung kanga atsükba mechi Myanmar nung taoba lenir aser Nobel Peace Prize ngur alila Aung San Suu Kyi ya tepuokdak yua aliba tangbo house arrest nung yua lir, ta mitkar temi ashir.

Major General Zaw Min Tun ajanga Mongulbarnü foreign media dang ashiba agi, Aung San Suu Kyi aser lar sorkar nung tir inyaka alisang Win Myint nungertem densema teintet rogotem aser temang nung tashi mait alirtem tepuokdak nungi belener ogo.

"Tzüngsang-mopung kanga tatsük asünung, Aung San Suu Kyi atema kisüng masü... Temang anema alitsü asoshi jelia mera agitsü nüngdaka alirtem, talisa teintet rogo tepuokdak alirtem atema onoki parnok heatstroke nungi kumzüka ayutsü asoshi inyaker," ta pai ashi.

2021 kum mitkari tashiyim amshia sorkar atsüngdokba sülen arishi kum 78 tain Aung San Suu Kyi ya Myanmar mitkari tepuokdak yua lir.

La ya ken o balala nung aika Naypyidaw nung kum 27 tepuokdak ayutsü obendang agütsüba ama yua lir, saka la bhukumer aser rights groups temi item ken o ya yimtenren

mechi yanglusaba lir ta ashir. Win Myint ya Bago Region kübok Taungoo nung kum ti tepuokdak ayutsü obendang agütsüba ama yua liasü.

Mongulbarnü Naypyidaw nung temperature ya 39 degrees Celsius (102.2 degrees Fahrenheit) liasü ta Myanmar indang meteorological department ajanga ashi.

Ajisüaka Zaw Min Tun-i tepuokdak nungi chioker ya kong aliar mashi. Tepuokdaka meyokdang Aung San Suu Kyi ya army alidak ki ka nung yua liasü.

La ya solitary confinement nung yua lir aser la taoba mapang ama temang junga meliaka tekolok shisatsü junga lir, ta February ita Aung San Suu Kyi'er jabaso Kim Aris-i shia liasü.

Pa tetsü taoba kum July ita house arrest nung yua lir ta osang prokshiba ya shidak masü ta Aris-i taoba mapang shia liasü. Iba mapang pai item osang ya alima nung aliba nübürtem mesüzüktsü mechi mitkar temi osang meshidak prokshiba lir, ta shia liasü.

Alima nung aliba sorkar aikati Aung San Suu Kyi aser danga political prisoner meyrirjang aika talenba kecha makai chiochtsü khanga liasü, aser United States, European

Union aser United Kingdom ajanga Southeast Asia nung iba linük mitkar anema tenokdangba balala agütsü.

Mitkar temi sorkar atsüngdoker kum asem sülen parnok asoshi tetsükdaktsü tulutiba ajurubaji Aung San Suu Kyi den sendaktepa aliba yimten yimsüsür temi amenokba National Unity Government (NUG) den sendaktepa aliba armed resistance movement ya alitsü aser tesem aika nung parnoki takok angur.

Mongulbarnü NUG indang odongtar kati Aung San Suu Kyi aser Win Myint nung talenba kecha makai chiochtsü ayongzüka liasü.

"Tepuokdak nungi kidangi anir aobaji junger, kechiaser tepuokdak dang nungi ki tajungba," ta odongtar Kyaw Zaw-i osangbener dang Mongulbar aonung ashi.

"Ajisüaka parnok talenba kecha makai chiochtsüla. Aung San Suu Kyi aser U Win Myint health aser security asoshi parnoki khuret ajak abentsüla."

Tan hopta Thingyan New Year holiday nüngtem nung tepuokdak alir nisung 3,000 dak tema nem mutkari tatok agütsüba mapang ka nung Aung San Suu Kyi belenba osang ya arur.

Myanmar nung ruling military council tekolakba Senior General Min Aung Hlaing-i tepuokdak alir nisung 3,303 nem tatok agütsü aser yangji bendanger 28 dena lir, shirnok Myanmar nungi pei linüki yoktsü, ta sorkar meyong MRTV ajanga ashi.

Mitkar anemba mechi nisung 20,351 tepuokdak lir, ta April 12 nü Assistance Association for Political Prisoners (AAPP) ajanga shia liasü.

# Russia-i Chernihiv yimti amak; nisung 13 süogo

**Kyiv, Rongchii/April 17 (Agencies):** Russia-i missile amshia Ukraine antoklentip nung aliba Chernihiv yimti amakba sülen nisung 13 süogo, ta ketdangsürtemi metetdaktsüogo.

Item tatalokbatem dak ajemdaker Ukraine-i parnok nem teyari agütsüba linüktem dang air defence agütsütsü atema asendenshir takhangba agütsüdar.

Interior minister Ihor Klymenko-i Bodhbarnü ashiba agi, missile agi ki, gari aser municipal infrastructure raksatsüogo aser iba den nisung 60 dak tema yirutsüogo.

Acting Mayor Oleksandr Lomako-i, missile asem agi anepdang 9 ako nung yimti nung kanga mazüngi inyaksangshiba tesem ka kongshia liasü, ta ashi. Nübürtem bus ka nungi jenshia ao aser emergency services aser medics tem iba tesemi aritepa oa liasü, ta Ukraine nung ketdangsürtemi metetdaktsü.

sendakba nung Russia-i kecha telangzüba agüja mali. 2022 kum February ita nungi Ukraine amak tenzükbä sülen Russia-i parnoki civilian mamaker ta shia arudar.

Chernihiv yimti ya linük yimtiba Kyiv nungi km 150 shi pilar Russia aser Belarus na den arrtsü nung lir. Iba yimti nung nütsünyongsük 250,000 shi lir.

Chernihiv regional hospital tekolakbai ashiba agi, mozükidang yirur alir nisung 18 tashi temang anepalutsüogo. Lendong nung yirurtem tanga mozükitemi benerogo, ta paisa ashiba den yimti nung alirtem dang azü tenlatsü mepeshia liasü.

"Ukraine nem air defence equipment peria agütsür ali asübo aser alimai Russia inyakyim nokdangsü atema temulungtetba takangba aliasübo iba ya matalokla," ta Ukraine tir Volodymyr Zelenskyy-i social media ajanga ashi.

Anüolen aliba linüktem nem air defence systems talila

agütsüdaktsütsü atema Ukraine-i mejembizükteti arudar, koba Russia-i asendenshir Ukraine nung power sector aser tanga tongtibang infrastructure tem dak rangloker yimtitem tali amakba mapang kanga nüngdaka lir.

Ukraine atema tetsükdaktsü kaji United States nung USD billion 60 shi alang military teyar agütsütsü atema sensaksem bangdaker aliba ya lir. US House of Representatives Speaker Mike Johnson-i Deobarnü pai iba hopta sensaksem tejakdangi bener aotsü merangtsü ta shiogo.

Kasa mapang nung Germany-i taoba hopta Ukraine nem US nung yangluba Patriot air defence system aser air defence missile tem agütsütsü ta shiogo.

Iba atema Zelenskyy-i, German Chancellor Olaf Scholz dang kanga pelaba lemsatepogo aser ashiba agi, iba ya Ukraine pusemba temaitsü chichiba lir.

# MULUNGNEN O



ASO : 14<sup>th</sup> Sep. 1934

ASÜ : 2<sup>nd</sup> April 2024

Ozü tsürabur **Asür PUNAMAYANG** (Longsa) pa akumli wadang tembangba asüku nung kija, kibong, arogo, kiyonger, yimsüsür, kinunger aser lokti balala shirnokisa nübu, rongsen aser sarasadem agi yaritepogo, ajak dangi tsüngdong arua pelaba meshiteter ajioda süaka asen teyangular Tsüngremi nenok ajak moajang.

~ Chirnur aser Semchir.

# LAND FOR SALE

North : 160 ft  
East : 160 ft  
South : 327 ft  
West : 290 ft  
Location : Dzuruzuo Merima Village, Kohima  
Price : 1 Crore 60 Lakh (Fixed)  
Contact No. : 9089842487

# Iran tiri Israel dang tekumdangtsü maneni ashi



Ebrahim Raisi

**Tehran, Rongchii/April 17 (Agencies):** Israel-i yimya tilatiba nung amakba atema tulutiba aser tesashitiba telangzüba agütsütsü, ta Iran tiri nenshia ashi, aser Middle East nung rara tulu tenzüksü tang tashi tetsübo lir.

Bodhbarnü Iran indang annual army parade mapang Tir Ebrahim Raisi-i iba o ya ashi. Hopta tatemlen Iran-i Israel amakba asoshi telangzüba agütsütsü ta alimai repranga atar.

Israel-i telangzüba agütsütsü nangzüka lir, aser ajaklen nungi iba mera magitsü ajungshir.

Iba sentong nung jembidang Iran-i indang-indanga Israel dak drones aser missiles khaloktsüba Raisi-i tushia jemi aser ibai "True Promise" lir ta ashi.

October ita Palestine nung aliba Hamas teloki Israel amakba "Operation Al-Aqsa Flood" sülen Gaza nung rara tenzük aser Lebanon aser Yemen nung Iran tembar temi Israel den maneni rarar.

Ajisüaka April 1 nü Syria nung aliba Iran indang consulate nung Israel-i amak südi ta temulung melemteti atalokba sülen Iran-i Israel dak indang-indanga mezüng amak.

"Operation Al-Aqsa Flood sülen 'True Promise' ajanga Zionism regime indang taila leniri dangar madak yimsü asüba laoba alimai nguogo," ta Raisi-i ashi.

Iran-i tesashiba nung amaktsü bilema ali asübo Zionism regime nung kecha manüngla, ta ashi.

Israel-i tayang kepzüka amak nungbo idangjisa telangzüba agütsütsü ta Iran ketdangsürtemi sangdonga lir.

"Iba mapangji Zionist regime yarir temi parnok miim tashi agi kecha mesütettsü ta angatettsü," ta tiri ashi.

Raisi-isa Israel tembar linüktema aija liasü. "Iba taochi maliba aser mapa tamajung inyakba yimli den tesendaktep tajung yanglutsü merangba linüktem tanübo akseta lir," ta pai ashi.

Iran-i amakba nung Israel-i telangzüba agütsütsü ata aliba mapang Israel-i Gaza nung raraba ajanga rara tesashi tenzüksü tetsübo nung lir.

Israel tembar United States, Europe, Japan aser Australia linük temi aremzüksü ashir aser külem Russia aser China-ia Iran dang kasahi ajungshir. Ajisüaka Israel ketdangsür temi telangzüba agütsütsü nangzüka lir.

## Barcelona Open: Rafael Nadal-i takok nguogo



**Rongchii/April 17, 2024 (Agencies):** Mongolbarnü Barcelona Open tebur kija asaya nung Rafael Nadal-i Flavio Cobolli ayong ayonga kokogo. Pa yiruba ajanga mapang talangka masayai lir tang asaya tenzükogo.

Grand Slam 22 tashi koker aliba asayar ya January ita nungi ATP Tour nung asaya ka danga asaya mali, ajisüaka pai Italy nung asayar ya 6-2, 6-3 agi ghonda ka ser minute 25 nung koka tanabuba round tongtetogo.

2022 küm French Open akokba sülen Nadal tang mezüngbuba clay court nung asayar aser pai taoba mapang asayaba ama mapangshi pa asayaba yimya sayuogo.

"Asayamung kanga junga tenzükotetogo. Meyipa arur asayaba mapang anogo ka nung dangbo tebilemtsü metoktsüteter, talisa physical level nung tebilemtsü aliba toktsütsü tasak," ta Nadal-i ashi.

"Mezüngbuba round asaya junga asayatetogo. Pai aibelen kar mena aser ni asayatsü nüngdaka aliba ama asayatetogo ta bilemer," ta paisa ashi.

Nadal, shibai otsüsüsüsa Roland Garros 14 ben koker lir aser taküma May ita iba asayamung nung shilem agitsü imla atadar.

Clay court king, shiba 2023 küm yiruba ajanga iba asayamung nung shilem magitet pa tanabuba round

nung Alex de Minaur den asayatsü.

Mezüngbuba set nung double fault ka mena 30-0 agi tesülen akümba sülen Nadal-i tajungba asaya tenzük aser kasa mapang nung Spain nung pusemertemi pa pusemba ajanga Cobolli asaya mesademi liasü.

Game pezübuba nung Nadal-i serve ka break süa 3-1 agi tejekdang aküm. Iba sülen ano pai Cobolli indang serve ka break süa mezüngbuba set akok.

Tanabuba set nunga Nadal-i Cobolli indang mezüngbuba serve game break süa 2-0 agi tejekdang aküm aser ano serve ka break süa 6-3 agi asaya koka liasü.

## PSG aser Dortmund na Champions League semifinal-i iogo

**Rongchii/April 17, 2024 (Agencies):** Paris Saint-Germain aser Barcelona na Champions League quarter final tanabuba leg nung PSG puri goal 4-1 agi Barcelona akokba sülen 6-4 aggregate nung parnok semifinal-i iogo.

Asaya nung Barcelona atema Raphinha-i mezüngbuba goal idaktsü, ajisüaka minute 29buba nung Ronald Araujo red card achiba sülen PSG pur jenjang junga aküm. Quarter-final mezüngbuba leg nungbo Barcelona pur 3-2 agi tejekdang liasü.

"Asaya metenzük tsüngda team jenjang mejungi liasü saka team-i asaya dak rangloker asaya.. kechi südir süiang onoki Barcelona akoktsü merangtsü liasü," ta Dembele-i ashi.

CL ponguben koker aliba team Barcelona pur, 2019 küm sülen tang mezüngbuba semifinal-i aitsü imla liasü, saka asaya nung Bradley Barcola alangdaktsüba atema Araujo red card achiba agi team jenjang mejungi aküm.

Tanga quarter final asaya ka nung Borussia Dortmund-i



Iba sülen Ousmane Dembele aser Vitorinha nati goal kaka idakja kasasa aküm aser Mbappe-i goal ana idakja parnoki asaya akok. PSG pur 2021 küm sülen tang mezüngbuba Champions League semifina-i iogo kong parnok Borussia Dortmund den asayatsü.

Sen aika intoka team yangluaka French champion team yagi CL khen danga koka mali, ajisüaka iba asaya nung parnoki team nung attack süa asayatsü atema tashi aliba sayuogo.

"Ni Paris nungi asayaba mapang Champions League akoktsü pungmanga aruogo aser tang team tajung ka ajangtetogo," ta Mbappe-i ashi.

"Onok Wembley-i aotsü merangtsü," ta paisa shisem.

Luis Enrique, shiba lenisüba nung Barca puri 2015 küm Champions League koka liasü, pai PSG team dak tamang akaba lemsatetogo.

Atletico Madrid 4-2 agi akokba sülen 5-4 aggregate nung parnok semifinal-i iogo. 2013 küm sülen Dortmund pur tang mezüngbuba Champions League semi-final tongtetogo.

Mezüngbuba leg nung 2-1 agi asaya makokba sülen Mongolbarnü asaya nung Julian Brandt aser Ian Maatsen nati goal kaka idakja 2-0 agi parnok tejekdang liasü.

Asaya tanabuba shilem metenzük tsüngda Atletico coach Diego Simeone-i asayar asem melen kong Angel Correa densema liasü. Asaya nung Mats Hummels-i own goal ka idaktsüba sülen Correa-i tanabuba goal idakja kasasa aküm.

Ajisüaka iba goal achiba sülen Dortmund pur tali küküm aküm aser Niclas Fuellkrug o Marcel Sabitzer nati minute asem tsüngda goal kaka idakja parnoki asaya koka liasü.

## Para-archer Sheetal-i Khelo India National Meet nung Silver angu



**Rongchii/April 17, 2024 (Agencies):** Asian Para Games nung gold medal ngur alila Sheetal Devi-i, Khelo India NTPC National Ranking archery meet nung silver medal nguogo. La Haryana tsür Ekta Rani sülen tanabuba jenjang nung tembang shiba, able-bodied aser junior world champion lir.

DDA Yamuna Sports Complex nung asayaba mapang arishi küm 17 tain Sheetal ya able-bodied junior archer tem den toktep aser individual compound event final nung 138-140 agi Ekta mekoki liasü.

Hangzhou Asian Para

Games nung gold medal ana aser silver medal ka anguba atema Sheetal nem taküm küm tetenzüklen Arjuna award agütsüogo. La ya phocomelia ta süir rare condition ka keter aso aser la ya teka maliba international para-archery champion mezüngbuba kümogo.

Sheetal-i, Khelo India asayamung nung shilem agiba ajanga tarutsü nung tetsükdaktsütem koktettsü atema la nem teyari agütsütsü ta ashi.

"International asayamungtem aser Olympics nung masaya tsüngda iba takok ajanga kü nem teyari agütsütsü," ta Sheetal-i ashi.

La indang coach Abhilasha-i ashiba agi, Paralympics masaya tsüngda iba tetoktepba ajanga la nem teyari agütsütsü.

"National ranking tetoktepba nung able-bodied asayartem den shilem agiba ajanga la training agitsü aser asayamung nung shilem agitsü atema maongka agütsür, koba Olympics masaya tsüngda kanga nüngdaka lir," ta archer coach Abhilasha-i ashi.

"Exposure atema bendangleni aotsüsa akümer saka kasa tajangshiba idakia angur. Domestic-level asayamungtem ajanga teyari agütsüdar," ta Abhilasha-i shisem.

Kasa mapang nung Ekta-ia, iba asayamung nung Sheetal-i shilem agiba ajanga la kanga ajungmesor, ta ashi.

"Ni taoba mapang Sheetal den asayaogo anungji ni la den asayaba tajangshiba lir. Küna December ita Patiala nunga asayaogo. La den asayatsü jangrademtsüka, kechiyong pa teka maketba archer ka lir aser iba ajanga ni kanga ajungmesor," ta Ekta-i ashi.

Asaya akokba sülen Ekta nem senpet sen 50,000 aser Sheetal nem senpet sen 40,000 agütsüogo.

## INDIA OSANG :

Tapak 3 nungi...

### Chhattisgarh kübok Kanker...

Iba osang angashia Union Home Minister Amit Shah-i, "Tanü Chhattisgarh nung Maoists telungpurtem mita aoba takok tulu anguba atema ni sepaitem nem tenüngsang agütsür. Ato kilonser Modi lenisüba kübok onoki linük nung

Maoists meshimeshia samatsütsü nükjidong yur inyaker," ta metetdaktsü.

Maoists telungpurtemi timtem agütsüba tesem- Bastar nung April 19 nü election agitsü aser Kanker constituency nung April 26 nü election agitsü.

## BILEMDANGANG

"Nisung ajak tagidak kakabo lir."